

卷之三

附進實錄表

奉天靖難推誠宣力輔運武臣特進光祿大夫左柱

國太師英國公臣張輔等誠惶誠恐稽首頓首

上言臣聞自古帝王有大德以及於萬民則必有信

史以傳於萬世是故堯舜之道載諸典謨文武之

政布在方冊漢唐而下莫不皆然欽惟

宣宗憲天崇道英明神聖欽文昭武寬仁純孝章皇

帝剛健中正廣大高明續

祖宗之鴻圖隆

慈聖之治養修六府而備三事親九族以和萬邦好

生之德允洽於民心育物於仁實協乎天道有戩
暴除亂之武有經天緯地之文聲教宣昭禮樂明
備華夏蠻貊罔不率俾山川鬼神莫不底寧
大畧雄材豐功偉烈輝煥前代儀範後未奄六御
之升遐切萬方之哀慕恭惟

皇帝陛下聰明睿智文武聖神尊
祖敬

宗維志述事上念

先皇之德業必著簡冊以流傳爰

勅儒臣纂修

實錄啓蘭臺之所載鈔金匱之所藏

徵諸官府之文書參以耳目之聞見大經大法備
究於精微善政善教致詳於本末言足為訓雖簡
必書事之可師雖繁必錄造化生成之妙固莫罄
於名言日月臨照之明亦豈容於繪畫至若臣下
之附載勉盡是非之至公恭成

宣宗章皇帝實錄一百十五卷

實訓十二卷合目錄凡例一百二十九冊謹繕寫
上進臣輔等愧庸淺之無庸屬編摩之甫就傳於永

世丕昭

道德之光率是

嘉猷茂衍太平之慶臣輔等無任瞻

天仰

聖激切屏營之至謹奉

表隨

進以

聞

正統三年四月十二日奉天靖難推誠宣力輔運
武臣特進光祿大夫左柱國太師英國公臣張輔
等謹上表

大明宣宗章皇帝實錄序

朕惟我國家 列聖相承創守之功道德仁義之
實咸登方冊以傳萬世我

皇考宣宗皇帝天德夙成聖德日熙昔在

皇曾祖太宗皇帝時風采聞於天下

皇祖仁宗皇帝統御之初正位東朝叅理庶政天下
被其澤及登大寶欽承

祖宗成憲圖任賢良恪存誠敬以典

神天躬行仁惠以育庶黎布昭英武以平僭亂篤親
親之意以睦宗藩得四海之心以隆 孝養在位

十年海內寧一外夷服從升遐之日率土臣民如
喪厥考嗚呼痛哉予小子恭膺 成命嗣承大統
乃詔儒臣纂修實錄閱三載始克成書總若干卷
嗚呼

皇考盛德成功聖謨大訓予以昭前烈裕後昆予小
子勉圖維述奚罄名言謹序其槩於卷端

大明宣宗章皇帝實錄

宣宗憲天崇道英明神聖欽文昭武寬仁純孝章皇

帝

仁宗昭皇帝嫡長子 母今太皇太后以己卯歲二

月九日生

上於北京生時衆望見光氣五采騰於宮闈之上先

太宗文皇帝夢

太祖高皇帝授以大圭命曰傳之子孫永世其昌

太宗皇帝拜受而寤以夢告

仁孝皇后皇后曰子孫之祥也已而宮中報

上生

太宗皇帝

仁孝皇后心咸異之彌月

仁孝皇后抱

上見

太宗

太宗皇帝視之顧謂

仁孝皇后曰此天日之表且英氣溢面符吾夢天汝

大宜謹視自是

仁孝皇后躬親撫養甚鍾愛焉

太宗皇帝既嗣大位

上時甫四歲

仁孝皇后以至南京間出見群臣瞻望驚異稍長在

宮中孝敬日隆而喜書冊初出就學

太宗皇帝命設講席於華蓋殿之東令太子少師姚

廣孝及翰林院內閣之臣往視講讀於武英殿

太宗皇帝時親視其智識益廣襟度益弘

太宗皇帝賜東宮官

勅曰朕惟令德所成本乎天賦養止之學實弘聖功

故有聰明統一之資必有詩書禮樂之教所以克
於德性而廣其器識也朕嫡長孫孝友英明寬仁
大度年未一紀体具志寧動必中規言必合道好
學之篤夙夜孜孜日誦萬言心領要義朕嘗試之
以事輒能裁決得中斯實

宗社之靈

上天賜慶篤生異質以福祐天下而基命於無窮然
宏材之建必由匠石之功圭瓚之成必假琢磨之
力卿等皆茂簡德義職輔東宮東宮之質必資兼
弼宜恊心同志輔導于成推廣仁義道德之源開

陳二帝三王之治與我

太祖高皇帝之大經大法凡創業守成之難生民稼
穡之事朝夕講論以涵養本源恢弘智量充其盛
大之器以為宗社生民之福國家有無窮之休卿
等亦有無窮之聞欽哉永樂七年 車駕巡狩北

京以

上隨行道途所經

太宗皇帝親以

上過田家遍覽農具及其衣食且諭以農民勤苦之
事曰此為帝王者不可不知也遂作務本訓以授

上具言農事之勤勞王業之艱難與凡無逸祭祀為
政睦親用人賞罰內治外威官寺飲食防衛理財
等事曰此帝王切要之道又命儒臣集聖學心法
皆親製序以授

上服膺惟謹

上天資明睿讀書一日數行大義瞭然每覽必盡卷
輒記不忘五經治道諸史治亂興亡之要尤當留
意諸子百家言涉道理者咸領會之

太宗嘗諭

上曰讀書當求大義不可效書生循行數墨徒費精

入神耳

上敬佩服出閣未幾

太宗問帝王心法所在以精一執中對

太宗大悅稍暇侍側應制作詩賦屢承獎賚永樂八

年

太宗皇帝親征北虜命

上留守北京以尚書夏原吉贊輔時諸司政務填委

且師行之際調度輓運事煩左右有言艱大者

上曰皇祖志有成法惟遵行之耳自是

太宗巡狩北京及征胡虜皆從行

仁宗皇帝嗣位

上為皇太子中外啟事悉歸裁處洪熙元年春南京
屢奏地震

仁宗皇帝諭廷臣曰南京國家根本之地灾異如此
天戒可畏朕當亟往但

皇考新復山陵何忍遽違群臣或請命諸王及重臣
往守者

仁宗曰非皇太子不可太子仁德威望足以服人心
人心安即
天意定矣况

太祖皇帝陵寢奉違已久朕夙夜在念

皇太子往庶幾如朕往也又曰往年

皇考北巡無內顧之憂者蓋以朕守南京今豈可他
命遂召

上計之

上泣下曰固不願違膝下然

宗社大計所在不敢辭遂決行既至南京謁

孝陵

仁宗皇帝不豫以璽書馳召

上還

上即日就道時南京頗傳言

仁宗上賓臣下未敢以聞但言茲正戒嚴之時宣整
兵衛而後行或勸

上從間道行

上曰

君父在天下歸心豈有他虞且予始至遽還非衆所
測况

君父召豈可稍遲遂由驛道馳還北京

大明宣宗皇帝實錄

洪熙元年夏六月己亥朔辛丑

上至自南京先是

仁宗皇帝上賓遺詔

上早正大位宮中以

上未還秘未發喪至是驛報

上至良鄉宮中始出遺詔文武百官常服於午門外

立班行四拜禮聽宣讀訖舉哀再行四拜禮太監

楊瑛同少保兼太子少傅戶部尚書夏原吉太子

太保禮部尚書呂震捧遺詔往盧溝橋迎

上中官先於盧溝橋設幕次香案俟

上至開讀

上既至聞有遺詔慟哭幾絕左右翼扶強詣幕次行禮聽宣遺詔訖哭盡哀禮畢易素服行文武百官皆素服迎

上於都城外

上至長安右門下馬步行哭至宮門外釋冠服披髮

詣梓宮前叩頭拜哭盡哀宮中自

皇后以下皆哭盡哀

上就喪次見

母后親王以下次見

上畢各就喪次行祭告禮遣訃親王頒遣詔

於天下

命禮官定

大行皇帝喪服禮儀

壬寅

行在禮部以

大行皇帝喪禮儀注進命如儀行之其儀注一自聞喪日為始不鳴鐘鼓一在京文武官聞喪素服烏紗帽黑角帶自明日始至第三日旦俱思善門

外哭退於本衙門宿歇不飲酒食肉第四日各俱
斬衰服至思善門外朝夕哭臨三日又朝臨七日
各十五舉聲止凡在朝及衙門視事用布裹紗帽
垂帶素服腰經麻鞋退居即服孝服通前二十七
日而除一文武官一品至四品命婦麻布大袖員
領長衫布蓋頭清晨由西華門入思善門外哭臨
三日而止悉去金銀首飾仍素服通前二十七日
而除一在京以聞喪為始禁屠宰十三日一軍民
素服婦人素服不粧飾俱以聞喪日為始二十七
日而除一聽選官辦事官監生人材吏典僧道耆

老聞喪即易素服自次日至第三日每旦赴順天
府朝闕設香案哭臨至四日官各具斬衰服監生
等素服朝夕哭臨三日又朝臨七日各十五舉聲
止仍各具素服通前二十七日而除一外國四夷
朝使行哭臨禮工部造與孝服一在京文武百官
祭祀品物光祿寺辦一內文武官吏人等遵依遺
詔二十七日釋服後仍終

太宗文皇帝服制一諸王子郡王及王妃郡王妃郡
主以下聞訃皆哭盡哀行五拜三叩頭禮畢並易
素服第四日易衰服遵依遺詔二十七日而除一

遺詔到日在外文武官吏人等素服烏紗帽黑角帶行四拜禮跪聽宣讀訖舉哀再行四拜禮畢各置斬衰於衙門內望闕設香案朝夕哭臨三日各十五舉聲止自是素服通計二十七日而除一在外官聞喪命婦素服舉哀三日各十五舉聲素服通計二十七日而除軍民男女止素服十三日初

大行皇帝上賓外間稍：有聞時上未至北京喧傳高煦欲舉兵犯闕人心詢：及上還始定而京師戒嚴已久

上至之明日召英國公張輔等諭之曰山陵之期尚遠今天氣炎熱戒嚴甚久將士煩勞其悉撤之輔等對曰

殿下未正大位軍衛未可撤

上曰天下神器非智力所能得况

祖宗有命孰敢萌邪心遂即日解嚴

癸卯

文武百官及軍民耆老等上箋勸進曰自昔聖帝明王之有天位也必傳之嫡長大統之相承大宗之相繼天理之所存人心之所屬夏商至周及漢唐宋享國之長皆由此道欽惟

大行皇帝德同天地明配日月續

太祖

太宗之洪業有帝堯帝舜之至仁即位之初首建儲副敬惟

皇太子殿下位居嫡長德本剛明稟天錫之英賢廣

日新之聖學足以維

祖宗之統足以得

天人之心蓋天下國家萬萬年太平之本實係焉伏
自

殿下正位以來問安侍膳孝行夙彰贊政施仁令名

遠播四方萬國靡不歸心三靈百神悉皆歆德茲
者不幸

大行皇帝賓天遺命

殿下早正大統海宇臣民共所瞻望夫天下不可一

日無君生民不可一日無主惟望

殿下即遵先志少抑哀情為國家之遠猷定

宗社之大計早登寶位永固皇圖臣等俯伏闕廷合

詞勸進六龍侍御仰如日之方升萬福延長願與

天而同久 遣鴻臚寺卿賈令諭文武群臣及軍

民耆老等曰覽箋具悉顧方抱痛終天哀哭在疚

維統之事豈忍遽聞所請不允

甲辰

文武百官及軍民耆老等復上箋勸進曰天叙有常大統世歸於嫡長元良正位萬邦永協乎太平今昔所同

天人協應洪惟我

太祖高皇帝創業垂統

太宗文皇帝維志述事武功文德之盛大華夏蠻貊之率從逮我

大行皇帝至仁厚澤被遐邇以克周大烈耿光丕顯

承而益茂

聖化方躋於熙皞宸遊遽至於升遐痛切臣民如喪

考妣恭惟

皇太子殿下孝友英明剛健中正天德夙著簡于

皇祖之心主器有歸遂正東宮之位以長以嫡宜民

宜人今茲遺詔之頒屬維神靈之統夫天下不可以無主寶位不可以久虛圖大處衆蓋帝王之道

天制合勸進摠臣子之至誠伏奉德音未賜俞允雖

哀忱未允於遽承而大孝必先於維述伏望

殿下體

先朝付託之重恩

列聖創守之難勉狗輿情早登宸位以奉

天地神祇之主以慰海宇生靈之心懋德建中興嗣
徽猷於

列聖體元正始開太平於萬年臣等披瀝丹衷拜伏
闕下仰九重之龍御效三祝於嵩呼 遣鴻臚寺
卿賈令諭文武群臣及耆老等曰覽所上箋卿等
憂在國家忠存

社稷至誠之心溢於言表顧予終天之痛方殷五內
摧裂維統之事豈所忍言所請不允

乙巳

文武百官及軍民耆老四夷朝使人等三上箋勸
進曰伏惟

帝王之立儲副所以為繼體之君承大統之正守

宗祧之重隆國家之本天心之所眷依人心之所仰
望者也恭惟

皇太子殿下剛健中正文武英明

太宗文皇帝期待之深

太行皇帝付託之重以嫡以長正位東宮仁聲遠播
於華夷孝行式彰於中外下愜人望上當

天心茲者不幸

大行皇帝賓天遺詔

皇太子即位以為

天地宗廟臣民之至

殿下位居儲副義合繼承而深切哀思未登寶位臣等俯伏闕下合詞勸進尚執讓退未賜俞允群情違_三莫知所措臣等重惟天下不可一日無君神器不可一日無主

殿下受

祖宗之託為神人之依宜即欽承豈容少緩且帝王

大孝以善維述為重以廣德教為先伏望

殿下稍抑哀情務從衆志即遵

先帝之命遂居大位之尊使三靈百神有所親賴四方萬國有所庇依此誠國家之大計臣民之至願也鄭王瞻垓越王瞻墉襄王瞻塏荆王瞻垺淮王瞻塏滕王瞻塏梁王瞻垺衛王瞻塏上箋勸曰天位之尊必傳於嫡長聖人之孝莫重於繼承此帝王之大經

祖宗之成法萬世不易之定理也恭惟長兄皇太子殿下位居嫡長德協重華

皇祖太宗文皇帝深期望為大器夙胎著於德音
父皇大行皇帝即位之始首頒冊寶命

長兄殿下正位東宮以承國本惟

長兄殿下聖學緝熙天資粹美謹視膳問安之孝廣

愛民育物之仁人望攸歸

天心允屬茲者不幸

父皇大行皇帝賓天遺詔

長兄即皇帝位蓋以生民不可無主神器不可暫虛

長兄殿下宜即欽承遂登大寶以主

天地百神之祀以慰

宗廟萬姓之心而深執哀情尚懷謙抑臣民勸進未

賜允俞離終天之痛難以克堪而為國之計誠宜

早定竣等同氣至親合詞以請伏願休

祖宗之意思付託之隆即居九五之尊下副億兆之

望善繼述於悠久開太平于萬年

丙午

諭禮部曰惟我國家自

太祖皇帝

太宗皇帝統一華夷奠安

宗社逮我

皇考大行皇帝克崇孝理啣哀聽政曾不踰年遺大
投艱于予小子予小子玆在疚而親王辟臣軍
民耆老及四夷之使累箋勸進拒辭不獲誠念
祖宗創守之艱

皇考遺命之重予其勉狗輿情即皇帝位尔禮部擇
日具儀以聞遂以擇日即位復書鄭越

梁衛諸王

丁未

行在禮部上即位儀注一先期司設監等衙門于
奉天門內陳設御座于中仍于奉天門設寶座尚

寶司設寶案欵天監設定時鼓教坊司陳設中和
韶樂設而不作一是日早遣官祇告

天地

宗廟

社稷

上具孝服設酒果親告

太宗皇帝几筵畢即詣

大行皇帝几筵前設酒果具孝服祇告受命畢即于

奉天門設香案酒果等物具衰冕服行告

天地禮之後赴奉天殿謁告

祖宗畢仍具袞冕詣

太宗皇帝几筵

大行皇帝几筵前俱行五拜三叩頭禮畢詣

母后前行五拜三叩頭禮畢詣奉天門即位一是日

早鳴鐘鼓錦衣衛設鹵簿駕

上御奉天門內文武百官各具朝服入午門候齊

上服袞冕鴻臚寺官引執事官進至奉天門內行禮

畢贊各供事贊請陞殿

上由中門出陞寶座錦衣衛鳴鞭文武百官上表稱

賀如大朝會儀畢出至奉天門外候頒詔翰林院

官贊詔書用寶鴻臚寺官請頒詔翰林院官捧詔

授禮部官由午門左門出錦衣衛先設雲蓋于午

門前候捧詔置雲蓋中導至承天門開讀行禮如

常儀

庚戌

上即位是日早遣太師英國公張輔告

昊天上帝

厚土皇地祇太保寧陽侯陳懋告

大社

大稷之神定國公徐景昌告

五廟

太皇太后

上親告

太宗皇帝几筵

大行皇帝几筵謁見

母后畢出詣奉天門即皇帝位文武百官免朝免宣

表止行五拜三叩頭禮遂頒詔大赦天下詔曰洪

惟

天眷國家茂隆景運肇自

太祖高皇帝聖神文武提一旅之衆建萬世之業永

固

宗社弘靖萬方

皇考大行皇帝紹承大統奉

天子民休

祖宗之至仁用輯寧於庶類自臨寶位夙夜勞動甫

及踰年德澤覃霑不幸違豫奄臻大漸顧命神器

付予眇躬哀慟方殷罔知攸措親王文武群臣下

至耆老軍民番夷朝使萬衆一誠累章勸進辭拒

不獲仰惟

列聖創守之難俯徇輿情已于六月十二日祇告

天地

宗廟

社稷即皇帝位為政所重以德及人其改明年為宣德元年大赦天下咸與維新所有合用事宜條示于后一自洪熙元年六月十二日昧爽以前至去年八月十五日以後官吏軍民人等有犯除謀反大逆謀殺子孫謀殺及毀罵祖父母父母妻妾殺夫奴婢殺主謀故殺人蠱毒魘魅毒藥殺人強盜不赦外其餘已發覺未發覺已結正未結正罪無大小咸赦除之敢有以赦前事相告言者以其罪

罪之一自去年八月十五日以後軍官及旗軍將軍力士校尉舍人餘丁除犯反叛黨惡不宥外其餘有犯發各處立功贖罪及降出充軍等項者並送兵部查理復其職役一自去年八月十五日以後文官除犯貪贓及枉害人命已發落者不宥外其餘有犯充軍吏役及承差者悉還吏部量能授官一自去年八月十五日以後見任文武官員有停罷俸祿者詔書到日仍舊開支一言路所以廣視聽達民隱自今朝廷政務或有不便及軍民利病當與除者許諸人陳言勿有所諱一農桑正

政之本衣食之源有司宜一為之勸務求實効勿
事虛文一安民之道必在守令得人軍民之中有
行已廉上才堪撫字者許見任官具列薦舉朕將
親擇而用不許徇私濫舉一學校賢才之所自出
必在師範得人今軍民中有經明行修可充教職
者許見任官保舉而試用之有司宜常加勸勉其
生員之家一依洪武年間恩例優免兩丁差徭俾
得盡心務學以臻成效一各處衛所及守邊去處
務要城堡堅固兵備嚴整如法操練一天下軍士
頻年勞役衣食不足艱難可矜即今一切不急之

務悉皆停罷其管軍官員宜加撫恤毋令失所並
不許假公營私妄有科歛及私役其力違者罪之
一有被水旱災傷去處缺食貧民有司即便取勘
賑濟毋得坐視民患一官民田地舊種入戶或全
家死亡或丁力消耗以致拋荒有司即與召人耕
種官田准民田起科如果無人耕種者該納稅糧
從實勘明開除毋得洒派包荒重為民患一各處
開辦金銀抄造紙劄坐買靛青除已辦造完見收
在官者差人送部外其餘悉皆停罷以蘇民力原
差官員人等速即回還如有托故稽延者以違制

論一遞年海運漂失及征進拋棄軍器等件并永樂二十一年以前各處拖欠歲辦皮翎歲進野味追補胖襖等項悉皆免追其追陪修理永樂二十一年以前試驗不堪弓箭弦條如已完者就於所在官司入庫如未完者悉皆停罷一各處孳牧馬驢牛羊等畜及北京所屬衛所見養永樂二十年征進所獲牛羊自洪熙元年六月十二日以前倒死悉免追陪其征進所獲牛羊今後只令軍衛有司自行提督牧養原差去官養官員人等即便回京不許托故稽延一忠臣烈士義夫節婦孝子順

孫事蹟顯著者有司具實來聞以憑旌表一鰥寡孤獨及篤廢殘疾者有司依例存恤毋令失所及有為事編發為民種田年七十以上孤寡無贍養者放回原籍依親一軍民有重役者不問三處五處遇有事故如果戶內人丁消耗只併一處勾丁補役其餘悉行開豁及有丁倒戶絕并同名同姓被人妄報速與分理不許徇私作弊害及無辜一見起在京做工人匠有二三丁者放回一丁四丁五丁者放回二丁六丁以上者放回三丁其單丁應役二年之上者放回休息內有犯罪被判剝刺

已成殘疾即與開除本身差役全其餘生其有無
知小人挾讐妄指平人為匠者今後有司宜加嚴
禁違者罪之一逃年失班及在逃人匠與免本罪
即來赴工依舊輪班如有仍前恃頑不即赴工者
所在官司拿解前來治之以罪永樂年間為事發
各處擺站及充運運水夫有年限已滿應替過三
年以上無替者即皆放免其餘役滿未及三年者
法司即與囚人內撥替若逃年在逃未及赴役者
俱免本罪即赴原撥處所應役照限撥替如有仍
前恃頑不即赴役者許所在官司拿解治之以罪

一逃軍逃囚逃匠等項以詔書到日為始許一月
內赴官自首與免本罪軍還原伍民還原籍匠作
人等復還本役一軍民官有貪虐害人者許被害
之人赴告于上司及按察司巡按御史處陳告不
許軍民人等擅自綁縛違者罪之一今後一應罪
宗犯悉依大明律科斷法司並不許深刻妄引榜文
及諸條例比擬一凡寬恤恩典及合行政務其有
開列未盡者悉遵去年八月十五日以後詔旨施
行務悖明信祇守不渝嗚呼

天制治保邦大經大法昭如日月垂憲萬年惟篤欽
承必誠必信尚賴宗室王親叔祖叔父協心藩屏
鞏固國家暨中外文武賢臣同德匡輔用臻至理
弘建

宗社生民悠久之福詔告天下咸使聞知以即位
遣書告諸王公主中天有白氣一道東西竟天
良久乃散

洪熙元年六月辛亥以即位遣使賚諭南京守備
襄城伯李隆曰今不幸

大行皇帝賓天親王文武群臣軍民耆老人等遵遺

詔累箋勸進朕以

宗社生民之重仰承遺命俯徇輿情已於六月十二
日祇嗣

皇帝位卿國家之勲臣受

先皇帝付託之重守備南京厥任匪輕其免赴京朝
賀凡事同守備太監鄭和王景弘計議晝夜用心
整肅軍伍嚴固守備審察幾微以防不虞戒哉將
士務循禮法使軍民皆安以副國家委任之重欽
哉

勅諭征南將軍總兵官太傅黔國公沐晟曰卿國家

世戚大臣功德茂著而受累朝付托鎮禦一方厥
任匪輕朕今即位免卿赴京朝賀惟茲統御之初
益切付毗之重尚其篤念

祖宗委任之厚摠厥嘉猷翼輔眇躬俾西南之民永
祇寧謐卿亦有無窮之譽欽哉

勅諭鎮朔大將軍總兵官陽武侯薛祿等及各邊將
曰卿等受先朝付託之重總率戎旅備禦一方厥
任匪輕悉免朝賀宜晝夜用心整肅部伍精利器
械嚴明紀律謹斥堠勤哨瞭察幾微以備不虞一
應邊務相機制宜務出萬全不可須臾怠忽尤宜

善撫士卒無令失所時常閱習作興士氣以副國
家委任之重欽哉

癸丑

忠勤伯李賢卒賢初名丑驢仕元為工部尚書洪
武二十一年來歸篤厚勤慎通譯書

太祖高皇帝賜姓名李賢授燕府紀善

太宗皇帝於藩邸時

仁宗皇帝為世子賢旦暮侍左右摠忠效勤多所裨
益當奉天靖難之際與效勞績累陞至都指揮同
知元北虜表奏之達朝廷朝廷詔勅告諭虜中者

睿命賢潤譯賢亦屢陳所見

太宗皆嘉納之

仁宗即位念舊勞陞後軍都督府都督僉事實資甚厚洪熙元年正月因事召賢知其已病

仁宗惻然念之遂封忠勤伯食祿一千一百石至是卒訃聞遣官賜祭命有司治喪葬如例

甲寅

上初視朝

上即位以來以哀戚未出群臣屢請至是始聽政于西角門

命平江伯陳瑄充總兵官率舟師漕運赴北京兼鎮

守淮安撫輯軍民所領官軍悉聽節制

勅湖廣都司都指揮李英曰爾祇事

皇祖歷有歲年

皇考嘉爾功能特命掌湖廣都司事朕今嗣大位篤念舊臣其都督任禮已留在京提督操練方面事宜爾且留彼掌事以待召命

行在禮部奏

皇上嗣登寶位明年改元天下大小衙門宜令各遣官一人朝賀

上曰方面府州縣及宣慰等官令來朝若教官巡檢
以下往復不易免來 襄城伯李隆言外衛官軍
自番國還者俱留南京聽用而月糧未支

上曰彼涉海遠還備歷艱險安可無糧其即按目給
支就留操備 戶科給事中夏時言德州以南民
多缺食鄒滕二縣尤甚

上命戶部遣官勘實給糧賑之 巡按浙江監察御
史尹嵩高奏朝廷近差內官內使於浙江市買諸
物每物置局拘集動擾供給繁勞朝廷所需甚微
民間所費甚大宜皆取回惟令有司買納

上諭尚書吳中等曰差遣中人本出權宜豈知勞擾
如此今詔書已罷買諸物若買完者即令回京未
完者悉皆停止 濟寧州知州蔣資奏去年薄收
民多艱食已蒙

聖恩賑濟而前二年田租米應納濟寧衛倉者逋欠
尚多今年夏麥頗收請以抵輸為便

上曰五穀皆能養人何分米麥從之 南京地震

乙卯

勅宋琥曰尔父西寧侯晟昔事我

太祖高皇帝

太宗文皇帝建立茂功致位通顯爾嗣父爵祇事我
皇祖

皇考小心勤慎蓋亦有年比乃行涉不恭為群臣所

劾

皇考不得已致汝于罰蓋將俾爾省躬思咎今龍御

上賓朕承天位上念

皇祖

皇考待爾之大德下念國家勲戚之舊臣特宥爾過

俾閑居優逸爾尚無忘

皇祖

皇考之大恩及朕所以優待之意坦懷端志勉圖自
新

上以京師見役軍匠勞動日久每人賜綿布二疋鈔

五錠鞋二雙

上諭少保戶部尚書夏原吉等曰各處軍民艱難已

甚凡諸衙門先有生派造辦紵絲紗羅氈段番貨

銀硃金箔及果品海味等物即遣人馳驛往諭以

辦完在官者令原差監辦官管運回京未辦悉停

罷如歲額不在此例有以仍前科擾於民者必罪

不赦寧王權奏遣世子磐斌來賀

仁宗皇帝萬壽聖節時已至中道復書止之 少師
吏部尚書蹇義等言內外官吏在

先帝時有坐罪愆幸蒙赦原即以親喪未告丁憂於
中必有詐者難聽其去

上曰父母之恩莫大焉君子不逆詐宜悉聽去若果
懷奸事發治之未晚 復孫亶鞏昌府知府時陝
西按察司奏亶在鞏昌虔心仁恕持身端恪賦役
均平刑罰清省吏畏其威民受其惠前以丁憂去
官者老乞留蒙朝廷矜允亶志彌勵公勤不懈今
滿九年當去鞏昌衛指揮千百戶旗軍汪壽等百

二十人屬縣者老三十一十五人皆留亶

上謂行在吏部臣曰郡得一賢守則一郡之人安古
之龔黃亦人耳苟有志無不可及孫亶能得衆心
可以為賢宜允所奏使天下郡守皆如此人百姓
豈有不安 罷浙江布政司叅議上和袁呈陝西
按察司僉事韓善為民和等時皆坐贓罪遇赦行
在吏部奏擬還職

上曰士大夫當務廉恥古人不飲盜泉蓋惡其名三
人者皆貪污豈可復任方面悉罷為民 總兵官
征蠻將軍鎮遠侯顧興祖奏前奉勅衛州府藍山

縣賊潘康生等逼近大橋巡檢司駐營劫掠可率
兵勦捕臣先遣官按視整兵維進而府縣皆言康
生等俱與^獠民讐殺未嘗流劫鄉村今皆赴官首
服徭民亦招撫向化所劫人畜皆已給主器仗皆
已送官臣覆勘無異謹送潘康生等三人赴京
師

上命付行在兵部尚書李慶等執奏康生等雖非流
劫鄉村終是聚眾讐殺必當論罪以警將來

上曰蠻夷私相讐殺乃其習俗既能首服又經赦宥
便可寬貸若復追論徃愆則沮自新之路非所以

廣德且放遣復業若再為非必寘重法更以此意
諭之使之改過 鎮守貴州總兵官都督僉事蕭

授奏鎮遠府邛水長官司與洞苗蠻苗銀總男苗
章奴等于清浪道中劫掠為鬼州都坪峩異溪蠻
夷長官司民所獲苗銀總率眾脅取之今聚兵一
千五百餘人欲攻剽其洞寨先令赤溪南洞長官
楊通諒同指揮祝貴往招撫之銀總伏兵於路殺
通諒等續遣湖廣都指揮張名進軍剿捕從之

無為州奏州民艱食缺種糧已將預備倉穀一萬
七千五百十餘石給借候秋成還官

上諭行在戶部尚書夏原吉等曰預備倉儲正為百姓比之前代常平最為良法若處處收積完備雖有水旱災傷百姓無可飢窘此

太祖皇帝良法美意卿宜徧行天下申明舊典務存實惠勿事虛文 浙江海門衛獻所俘倭寇奏云五月二十日倭寇自甯興二港入攻挑渚千戶所城官軍禦之衆寡不敵城幾陷千戶徐忠李海率兵力戰擒賊三人斬首十級賊被傷乃走忠海皆被傷賊出洋遇海門巡海指揮路鐸兵追及之與戰又生擒賊三人斬首七級以飛石碎賊一

舟舟中盡溺死遇夜風雨賊潰去

上命以所俘付錦衣衛獄乃命行在兵部第官軍功狀以聞 昏刻有流星大如鷄彈色赤有光出心宿西南行至雲中

丙辰

行在禮部定議

大行皇帝尊謚曰粵稽古聖帝明王皆有尊號鴻稱垂於萬世自堯舜禹湯文武成康暨漢唐宋賢君諡辟靡不皆然蓋所以索國家之盛典而著功德於無窮也仰惟

皇考大行皇帝上聖之資純誠之德至仁合于天地
大孝通于神明久在儲闈贊理機務億兆欣戴四
海歸心自登大寶夙夜孜孜矜憫困窮覃霈澤弘
被萬方修舉墜典作興化理文德彰明一新宇內
克詰我兵神武不殺邊境寧肅弗怒而威民物熙
熙泰和之世不幸期歲奄棄臣民茲予續承大統
祇仰鴻猷明徵禮文必為謚號所宜博咨衆論務
協大公用昭宣戒

皇考大德光華於無窮爾禮部其集文武群臣定議
尊謚擇日恭上用寶徑体朕意其惟欽哉

上以營建山陵勅平江伯陳瑄發運糧軍五萬人助
役以待從舊恩陞右春坊右贊善王謙為行在
吏部右侍郎左春坊左庶子陳山為行在戶部左
侍郎司經局洗馬張英為行在禮部右侍郎戴綸
為行在兵部右侍郎直隸六安衛奏二月十八
日夜地震也日止城垣數堞多傾塌請修治
上命候秋成畢備之河南新安知縣陶鎔奏縣在
山峪土瘠民窮從來薄收去年尤甚今民食最艱
採拾自給公私無儲違：無措獨丞閔驛頗有儲
糧欲申明待報然後給濟然民命色在旦夕已先

借糧一千七百二十八石給貧民一千八百一十七戶候秋成還官

上謂尚書夏原吉曰知縣所行良是朕聞近年有司不体人情苟有饑荒必須申報展轉勘實賑濟失時知縣急于濟人先給後聞是能稱任使卿毋拘又責其專擅

丁巳

秦王志均奏承運殿歲久弊壞弟妹三人年長婚嫁及期皆未有居室今蒙遣回西安護衛征進官軍五千人乞留脩造從之 聽選主事陳良言文

職官已有考覈黜陟之令獨于武職未嘗舉行宜亦考覈

上諭行在兵部臣曰軍職以功為叙次子孫承襲者試弓馬有罪者論功定議

祖宗成憲如此無庸他言 以隨侍舊勞命醫士朝叔陽為行在太醫院判

戊午

上御西角門是日雨行在工部尚書吳中奏沙河清河等處舊架木橋以便往來今天時雨行潦水將作恐為所漂宜且撤之候雨止復舊

上曰橋梁雖為經久之計毋徒勞民中奏今建山陵
軍民往來運木石等物請大通關提舉司取船作
浮梁以濟從之 哈密回回滿刺撒丁等來朝及
貢方物 陞安平縣丞耿福緣為本縣知縣福緣
初為丞以冗負當汰民詣闕保留後又以冗汰民
復奏留至是又以冗汰耆老八十餘人訴於巡按
監察御史言福緣守法奉公愛民如子賦役均平
盜賊屏跡田里獲安今去民失所望且見任知縣
楊紀有疾求去乞留福緣以惠民庶御史以聞
上諭行在吏部臣曰州縣官愛民如子則民亦愛之

如父母若貪虐無道民視之如讐豈肯保留至于
再三不已其陞安平知縣 鎮守大同總兵官武
安侯鄭亨上去羊屯田子粒數

上諭尚書夏原吉曰邊軍屯田可省轉輸之勞卿等
宜遣人覈實所積果多當如例賞之

庚申

上諭行在禮部臣曰朕惟君國之道必隆乎孝理化
民之務必首于尊親恭惟

母后皇后厚德承天至順配地佐輔

先帝仁惠邦家表正六宮母儀四海而鞠育眇躬備

隆恩德啓迪攸行篤行

聖訓今續紹伊始負荷孔艱惟慈廕之永依而尊號
之未稱必將備帝王之典禮率天下于孝敬謹

上

母后尊號曰

皇太后寶冊儀章禮部詳定以聞

上御西角門諭太子少保行在兵部尚書李慶等曰
比聞陝西官軍調來京師操備河南山西官軍調
往陝西甘肅備禦交互往來甚是勞費凡事當順
人情若令陝西官軍就彼備禦河南山西官軍調

來京師操備豈不兩便非徒省勞費人亦樂從爾
兵部宜速行之毋令疲於道路 夜有流星大如
鷄彈色赤有光出天并東南行至雲中

辛酉

陝西布政司奏諸衛軍士歲給冬衣布花皆於夏
稅內折收分給催徵已久未給尚多蓋緣今歲民
間春夏少雨虫蠶害稼民食艱難猝難措辦舊例
每布一疋折鈔十五貫綿花一斤折鈔二貫今欲
官錢內布一疋折與鈔十五貫綿花一斤折與鈔
六貫庶幾少紓民急而軍士得用

上謂尚書夏原吉曰軍民皆可憫舊未給者且准折
鈔後當如例給布花 行在錦衣衛奏蜀府儀賓
高晟顧瞻始因刻奪被逮請送都察院鞫問
上以事在赦前命釋之

命右善世端竹頌占為圓妙廣智大國師給與金印
玉軸誥命 昏刻有流星大如盃色青白有光出
明堂西南行至近濁曉刻有流星大如碗色赤尾
跡有光出正北雲中北行至雲中

壬戌
行在禮部上

大行皇帝謚議儀注前一日西角門設謚議文案是
日早

上具素服御西角門捧謚議官於階之東文武官各
具素服詣丹墀贊行四拜禮興禮部官奉進

尊謚序班二員引班首稍前捧謚議官以授班首班
首授謚議文由中道進將至御前序班贊進

尊謚議文

上興詣文案班首進謚文置于案跪百官皆跪

上覓畢以謚議文付翰林院官撰冊文序班徹案

上復坐班首與百官皆俯伏興復位行四拜禮畢然

後視事 廣寧中屯衛軍士馬述上言學校風化
之原所以明人倫厚風俗今定遼金復海蓋五衛
洪武中已建學官而萬全瀋陽廣寧義州諸衛未
設若緣邊軍衛並立學校以教官軍子弟使知忠
君孝親上尊復親教長則禮義興而風俗厚矣又言
遼東早寒朝廷歲賜軍士冬衣布花氈二十四衛
今皆於金州衛旅順口貯積分給諸衛相去遠者
二千五百里或二千里往復甚艱且妨廢農功若
如洪武舊制定遼三萬瀋陽海蓋諸衛于牛莊廣
寧義州諸衛於陵河金復二衛於旅順口貯給則

軍士甚便農功不廢又言遼東驛路經由錦瑤二
州而二州相去三百里多荒山密林寇盜出沒使
命往來未便若于二州之間女河兩岸肥饒之處
修城置衛屯種防閑則田野闢道路通永無外虞
上曰所言皆有理禮部其議行之 夜有流星大如
盃色青白有光出辟南行至近濁

癸亥

行在禮部尚書呂震等奏欽蒙勅諭臣等會同文
武群臣議上

大行皇帝尊謚臣等謹遵會同太師英國公臣張輔

及公侯伯五府六部都察院等衙門議擬呈進臣
輔等聞昔古帝王有盛德大業俾著于當時則必
有顯號鴻名永傳於後世所以昭國家之異典合
天人之至公也粵自堯舜下及漢宋放勳重華贊
帝德之廣大祖功宗德啓廟祀之尊崇經史所存
古今同軌伏惟

大行皇帝以聖智之資撫盈成之運德同

天地巍蕩莫能備諸形容治洽華夷皞皞熙熙
咸有資于化育夙居儲副上贊洪猷視膳問安隆
君親之至愛撫軍監國得億兆之歡心二十餘年始

終一致天下同乎仰戴邦家協于昇平統承大寶
之初大布維新之政蠲逋負恤困窮慎刑罰則寧
失不經念黎元則如保赤子深仁厚德洽遠近而
彌周大烈耿光丕顯承而惟茂海宇方躋于仁壽
龍輿遽至于升遐嗟我臣民如喪厥考稱

天以誅固輿論之攸同極親而尊惟大德之斯稱虔
恭寅畏天命自虔敬

天之心益嚴而益密恭默思道緝熙聖學体道之功
愈至而愈謙經綸大經建立大本咸出乎至誠宣
昭義聞彰信兆民實由于明德弘敷文教則禮樂

備而人才興教修武事則中國安而外夷順至若
經德秉哲同符往聖維志述事率導

先王由是

天地以位萬物以育

宗廟享之子孫保之蓋至仁之實兼充乎至善宜

宗祀之盛光華于萬年臣輔等謹稽禮文徵諸謚

法

大行皇帝尊謚宜

天錫之曰敬

天体道純誠至德弘文欽武章聖達孝昭

皇帝廟號

仁宗臣輔等拜首稽首謹具奏聞 左刺部屬亦速

不花等五十四人來歸行在禮部尚書呂震奏定

賞例

上曰遠人慕義舉家來歸撫之當厚本雅夫里乃彼

故主今其妻亦遠來名分不同恩亦當異其別與

好地宅于是各賜金織襲衣綵幣銀鈔鞍馬有差

仍命有司給房屋器皿牛羊月支薪米 浙江布

政司左布政孫雋河南布政司左叅議王徽坐贓

罪罷為民時行在吏部奏比蒙大赦內外官員有

罪皆_已寬宥浙江左布政孫雋河南左叅議王徽
俱犯罪雖經赦例應復職然所犯者_犯贓罪
上曰犯贓汙喪廉耻矣雖經赦宥豈可復居民上其
皆罷為民 日生背氣色赤青鮮明

甲子

朝鮮國王李禔遣陪臣孟思識等奏表貢馬及方
物 復孫瑛行在通政司右叅議高慶行在鴻臚
寺右寺丞瑛等永樂中有過謫文趾初

仁宗皇帝即位有言其諳政事堪任用者_有存_有旨召還
至是始至

上命俱復其職 行在工部請造

皇太后皇后皇妃儀仗

乙丑

行在禮部上

大行皇帝尊謚儀注先期文武百官于本衙門齋宿
三日至期 几筵前陳設如常祭儀設冊寶案二
于 几筵前左右前一日置冊寶輿于奉天門設
香亭于丹墀內正中內使官俸冊寶置于輿是日
上具素服御奉天門內侍官舉輿導駕官導引
上隨寶輿後降階陞輅百官具孝服于金水橋之南

皆北向序立候寶輿將至百官皆跪寶輿既過輿
皆隨至思善門外北向序立其內侍導引官導
引

上至思善門降輅易孝服親王皆孝服隨班行禮寶
輿於中門進至 几筵殿前丹陛上

上由左門入至丹墀內侍官唱執事官各司其事內
侍官導引

上至丹陛上詣拜位捧冊寶官于寶輿內捧冊寶由
殿左門入至于 几筵前右北向立內侍官奏行
四拜禮親王皆陪拜在外鴻臚寺官唱傳百官皆

行四拜禮畢內侍官導引

上由殿左門入至

大行皇帝神御前奏跪傳贊百官皆跪奏進冊捧冊
官跪進于

上左

上受冊以冊授執事官置于案奏進寶進寶官以寶
跪進于

上左

上受寶以寶授執事官置于案奏宣冊宣冊官跪于
上左宣冊訖奏宣寶宣寶訖奏俯伏興平身傳贊百

官同奏復位內侍官導引

上由殿左門出至拜位奏四拜傳贊百官同四拜畢
內侍官導引

上至 几筵前奏初獻禮奏跪奏獻酒奏讀祝奏畢
奏亞獻禮奏獻酒奏終獻禮奏獻酒奏俯伏平身
奏復位內官導引

上由殿左門出至拜位贊四拜其前後四拜禮及跪
俯伏興傳贊百官同祭畢內侍官導引

上由左門入至
大行皇帝神御前以寶冊授內侍官捧入內導引

上入內安冊寶行叩頭禮導引

上由左門出至丹陛上奏拜畢次日百官各具素服
烏紗帽黑角帶于奉天門候開讀上

尊謚詔

勅南京守備襄城伯李隆等以軍士一萬人赴北
京勦建山陵遺的當官率領前來仍嚴禁約在
途不許稽緩及擾民違者罪之 巡按江西監察
御史王縉紳奏按察司副使申岳等昧於憲休及
諸理問斷事推官不諳刑律皆應降黜
上曰按察司振飭紀綱理刑官辯明曲直其可授之

非人吏部即選人代之 召鎮朔大將軍陽武侯
薛祿還京

丙寅

行在禮部上尊

皇太后及冊立皇后皇妃儀注一祭告禮前期太常
寺官具奏致齋三日遣官告祭

天地

宗廟

社稷祭告

太宗皇帝几筵

大行皇帝几筵一尊

皇太后禮前期禮部移文各衙門是日鳴鐘鼓百官
具朝服隨班行禮前期一日內侍官於奉天門設
冊寶綵輿冊東寶西設香亭一于冊寶綵輿之南
正中教坊司設中和韶樂及大樂設而不作是日
早錦衣衛陳設如常儀內侍官設

皇太后寶座于宮中陳設儀仗于丹陛上及丹墀內
設冊寶案一于

皇太后寶座前又設香案一于冊寶案前設

皇帝拜位于丹陛上正中設親王拜位于丹墀內設

內贊二人引禮二人設女樂于丹陛上設而不作
至期

皇帝御奉天門內捧冊寶官俸冊寶俟

皇帝具冕服出捧置于綵輿內侍官舉輿導駕官導
引

皇帝隨綵輿後降階陛輅百官于金水橋南北向序
立俟冊寶輿至皆跪既過輿隨至思善門外橋南
北向序立

皇帝至思善門內降輅女官請

皇太后陞座冊寶輿由中門進至宮中丹陛上置于

皇帝拜位前冊東寶西內引禮官導引

皇帝由左門入至丹陛上右邊向北立內贊唱執事
官各司其事引禮官導引

皇帝至拜位親王具冕服各就位拜奏四拜傳唱鴻
臚寺贊百官皆四拜畢捧冊寶官于綵輿內取冊

寶捧由殿中門入至

皇太后前左邊立

皇帝由殿左門入至拜位奏跪傳唱親王百官皆跪
奏播圭進冊捧冊官以冊跪進于

皇帝右

皇帝受冊獻訖以授執事官執事官跪受置于案上
之左進寶捧寶官以寶跪進于

皇帝右

皇帝受寶獻訖以授執事官執事官跪受置于案上
之右奏出圭奏宣冊執事官跪宣讀訖奏宣寶執
事官跪宣寶訖奏俯伏興平身傳唱同奏復位導
引

皇帝由左門出至拜位奏四拜傳贊百官同四拜畢
奏禮畢駕興一冊立皇后皇妃禮鴻臚寺預設節
冊寶案節案居前皇后冊寶案次之皇妃冊案又

次之設節冊寶綵輿于丹墀內教坊司設樂及錦
衣衛陳設皆如前內官設皇后皇妃受冊位於各
宮中設節冊案于冊位之北皇后寶就置于冊之
右共為一案節案冊在案之前又各設香案于節
案前設內贊各二人引禮二人設女樂于丹陛上
設而不作至期

皇帝御奉天門內具皮弁服鴻臚寺官奏執事官行
禮畢奏請陞殿導駕官導引

皇帝陞座文武百官具朝服入班行叩頭禮左右侍
班正副使入就拜位贊四拜興傳制官俯伏興執

事官舉節冊寶案由殿左門出置御道中傳制官
由左門出稱有制贊正副使跪制曰某年某月某
日冊妃某氏為皇后某氏為貴妃某氏為淑妃某
氏為惠妃命卿等持節行禮贊俯伏興四拜禮畢
執事官捧節冊寶置綵輿中黃蓋遮送至左順門
外正副使朝北立內官捧節冊寶由正門入迎至
皇后皇妃各位宮中節冊未至之先引禮請

皇后

皇妃各具禮服候節冊將至宮人執扇擁護引禮引
皇后

皇妃各迎至宮中節冊寶至

皇后宮中內官以冊寶置于一案冊左寶右置節于

節案內贊贊四拜禮贊宣冊寶跪女官立宣于

皇后之右訖贊宣寶女官立宣于

皇后之右訖贊授冊贊指圭執事女官取冊跪授于

皇后之右授訖以冊授女官女官跪授立于東贊授

冊寶執事女官取寶跪授于

皇后之右授訖以寶授女官女官跪授立于東在冊

之次贊出圭典內贊贊四拜禮畢內侍持節由正

門出

皇后送出官門外節冊至諸位

皇妃宮中行禮同但不贊宣寶授寶但贊授冊後四拜即贊禮畢內官持節由正門出

皇妃送出官門外各內官齋節出至左順門內待齊乃出左順門外以節授正副使報禮畢正副使得報持節復命一謁謝禮是日

皇太后授冊寶畢俟

皇后皇妃俱授冊寶訖內官先具謁告儀物翰林具謁謝文

皇太后

皇帝皇后皇妃各具服訖

皇帝奉

皇太后及率皇后皇妃祇謁

奉先殿及詣

太宗文皇帝几筵

大行皇帝几筵前謁禮如常儀一慶賀禮是日

皇太后行謁謝禮畢仍於宮中服燕居冠服陞座儀仗女樂如前陳設女官具服侍班如常儀內引禮

官引

皇帝皇后皇妃親王公主及六尚等女官行慶賀禮

如常儀皇后皇妃詣

皇太后前行禮畢俟

上服皮弁服陞座內贊引官引就拜位行八拜禮
皇后謝

上畢行慶賀禮內官先于皇后宮中設座南向設諸
皇親諸命婦拜位于階之南北向設儀仗設女樂
設而不作設內贊二人引禮二人女官二人導引
皇妃等具服以俟

皇后服燕居服冠陞座引禮引皇妃公主六尚等女
官行慶賀禮如常儀次日外命婦四品以上入行

進表箋禮女官先于

皇太后皇后宮中左門外設表箋案各一儀仗女樂
陳設及侍班如常儀命婦是日早于長安左右門
入塏由西華門進至宮門外俟引禮官引入丹墀
內東西相向立

皇太后服燕居冠服陞座引禮官引命婦入班贊四
拜贊跪贊進表引表案女官二人前導女官舉表
案由左門入至

皇太后前置訖贊興贊四拜禮畢駕興命婦經右順
門入左順門至中宮門外俟引禮官引入丹墀內

東西相向立

皇后服燕居冠服陞座引禮官引命婦入班贊四拜
贊跪贊進表箋引箋案女官二人前導女官舉案
由左門入至

皇后前置訖贊興贊四拜贊禮畢駕輿命婦由東華
門出 行在禮部尚書呂震奏

大行皇帝喪禮原定儀注自六月初三日聞喪為始
百官素服白紗帽麻布腰經于西角門朝參遵依
遺詔二十七日而除今請自七月初一日為始鳴
鐘鼓

上服淺淡色衣烏紗翼善冠黑角帶于奉天門視事
百官皆淺淡色衣烏紗帽黑角帶朝參如常儀退
朝仍終

太宗文皇帝服制

上曰固是遺詔然朕心何能忍古人云雖加一日愈
于己初一日仍素服坐西角門不鳴鐘鼓待滿百
日再議

唐王瓊燿奏欲躬詣

大行皇帝几筵致祭

上以天氣炎熱且遺詔有命復書止之自是諸王欲

來者止之

賜哈密忠義王使臣馬黑蘇六十六人鈔絲幣表裡
有差

丁卯

行在工部尚書吳中奏營建山陵人力不敷請
于南京海船廠及附近江北府衛起旗軍工
匠一十一萬八千協助從之因謂中曰今天
氣炎熱天壽山營繕軍民艱若人賞鈔五錠
布二疋鞋二雙又曰山陵事重朕不吝賞但
有司不恤人艱有侵尅之者爾宜督管工之

人逐名給散勿容欺獎

大明宣宗章皇帝實錄

洪熙元年七月戊辰朔

漢王高煦趙王高燧遣指揮康良魯昇奉表賀
即位禮部尚書呂震請如例各賜鈔二十錠綵幣
二表裏

上命加賜鈔二百錠綵幣二表裏 懷慶大長公主

薨公主

太祖皇帝第六女母成穆貴妃孫氏洪武中冊封下
嫁駙馬都尉王寧

仁宗皇帝即位加號大長公主至是薨遣中官賜祭

命工部營壘 行在太常寺卿王勉生贓罪罷為
民勉嘗受賄奏保香匠丘信等充齋郎事覺信等
已伏罪時勉出使陝西

仁宗皇帝謂吏部尚書蹇義曰勉當罪之至是還義
奏勉貪婪

先帝嘗欲罪之今雖更赦難以復用

上曰太常有罪豈可事神明其罷為民順天府通
州武清固安灤縣各奏六月二十二日驟兩河溢
衝決河西務白浮宋家等口堤岸 浙江按察司
副使許銘言備邊禦我國家重事理兵足食備禦

大經近來邊軍困于雜役多致逃亡防守既疎屯
糧亦鮮宜悉矜免專令備邊如舊給與俸糧其有
餘力各遣屯田則食足兵強守固戰勝矣又言夷

狄獸心難以德服其曰歸誠朝貢實皆慕利而來
爵賞雖加反側難保宜有樽節稍設防閑如祖訓
條章許其來朝者或三年五年一至其餘悉且停
止則送往迎來免困民力府庫之財不至妄費

上嘉納之 夜有流星大如鷄彗色赤尾跡有光出
羽林軍南行至雲中

上 大行皇帝尊謚是日早遣太師吳國公張輔等
告

天地

宗廟

社稷

上親告

太宗皇帝几筵畢上

大行皇帝尊謚冊文曰孝子嗣皇帝臣 謹再拜稽
首言臣聞名以表實號以昭行惟古聖神道德之
盛不可名言而伏羲神農黃帝堯舜皆因治化之

隆必崇顯大之號恭惟

皇考大行皇帝躬上聖之資蘊太和之德剛健中正

廣大仁明久正儲闈詞履

帝位欽若

天道憲章

祖宗誠孝通于神明皇恩被于普率丕顯文化一新
德政如陽春之施如日月之行哀矜庶獄民用不
堪敬脩武事不厲而威外順內安邦以寧謐天下
歸戴如慈父母上賓之日遠迓興哀

聖德神化宜薦

尊號用咨輿議請命于

天謹奉冊寶上 尊謚曰

敬天体道純誠至德弘文欽武章聖達孝昭皇帝廟
號

仁宗伏惟

聖靈在天昭鑒于下佑我子孫爰暨黎庶億萬萬年

永隆洪祚 謚皇庶母貴妃郭氏曰恭肅淑妃王

氏曰真惠麗妃王氏曰惠安順妃譚氏曰恭禧充

妃黃氏曰恭靖 日生暈上隨生背氣及左右珥

色皆黃赤鮮明夜有流星大如鷄彈色青白尾跡

有光出五車東北行至雲中

庚午以上

仁宗皇帝尊謚詔告天下曰朕惟聖神之道不可以

名言功德之隆必行諸贊述是以皇有義農之號

帝有堯舜之稱國之典常古今一揆恭惟

皇考大行皇帝稟睿聖之資備明誠之德正位儲副

二十餘年至孝通于神明令聞孚于遠邇嗣登大

寶寅奉鴻圖休 天之心弘敷惠澤溥昭蘇于萬類

煥寰宇之一新政理興化敷尚文雅慎脩武事四

境無虞天下歸仁安于熙皞不幸踰歲奄屆賓天

四海兆民如喪厥考嗟予^罔極之慟屬茲維統之初諒惟敬誠之心歎後追崇之典謹命在廷文武群臣稽古禮文謹薦謚號至公之道衆論攸同乃于七月初二日祇告

天地

宗廟

社稷奉冊寶恭上

皇考大行皇帝尊謚

敬天体道純誠至德弘文欽武章聖達孝昭皇帝廟號

仁宗嗚呼配

天惟德尊親惟孝光華先署于萬年繼述尚存於永世布告中外咸使聞知遣中官雲仙往雲南鎮守

上諭之曰朕初即位思慮遠方軍民或有未安爾內臣朝夕侍左右者當承委托務令軍民安生樂業凡所行事必與總兵官暨因公及三司計議施行仍具奏聞遇有警備則相機調遣毋擅權自用及肆貪虐蓋爾輩出外孰有不恃寵驕傲者若稍違朕言治以重罪必不尔貸巡按福建監察御史

彭謙奏建寧知府同知皆鄙儒無為推官以下恣肆貪虐或酣飲廢事宜加黜罰悉以名聞

上曰果如御史言典銓選者不得解其責其令吏部黜罷如例務存公論毋速後愆夜有流星大如鷄彈色赤尾跡有光出閭東南行入壁

辛未

上諭行在戶部尚書夏原吉等等曰此觀卿等所言天壽山營造軍匠月支糧賜旗軍所給比工匠差減勤勞既同而糧賞不一何以協人心孔子曰不患寡而患不均工匠旗軍一例給之行在工部臣

奏昨有旨趙王之國其社稷山川祭器樂器冠服之屬皆給之今閱視諸器物歲久多損請修理給之

上從之諭之曰凡朝廷給親王之物皆當精好况祭器樂器皆以祀神當加好也雲南鎮沅府土官知府力騰交趾嘉林州土官判官阮祐四川烏蒙軍民府土官知府祿昭遣把事阿賴湖廣金洞安撫司把事冉中廣西上思州土官知州黃智永貴州羅番等長官司土官舍人龍通源等來朝貢家馬及方物復王壘山東平度州同知劉整昌邑

縣主簿壘先以冗員去任整以舊官代還至是民
伏闕上言壘等有善政能恤民瘼戢吏弊請復其
職

上諭行在吏部臣曰為人上者惟順民心古語云民
之所好好之民之所惡惡之堯舜之治亦順民好
惡而已其悉從之 起復邵陽縣知縣孫浩先是
陝西按察司言西安府咸寧縣缺知縣前邵陽知
縣孫浩撫字不怠廣公有為吏畏其威民懷其惠
比丁家難去官乞起復調咸寧以便民

上諭行在吏部臣曰按察司于屬官必知其實邵陽

距咸寧不遠於人情土俗亦必周知其從之遂起
復為咸寧知縣 陞行在錦衣衛指揮使鍾信為
湖廣都司都指揮僉事

命行在旗手衛指揮僉事李得理本衛事

壬申

奴兒干吉列迷千戶速只哈奴自遼東來貢馬奏
願居京自效賜鈔紵絲襲衣綵幣及布仍命有司
給房屋器皿牛羊月支薪米速初只哈奴以招撫
至京授正千戶願居遼三萬衛至是復願居京故
有是賜

賜冷密回回滿刺撒丁等鈔練幣表裡及紵絲襲
衣有差 行在工部奏舊經閣刺銀匠周阿佛等
七十六人自陳老疾乞如詔書免役請令順天府
驗視故免若年未及六十精力未衰者仍令赴工
上曰刑餘之人經歷年久其稱老疾必不妄不必展
轉可悉免其役令于大興宛平二縣閒住

癸酉

陞行在錦衣衛指揮同知張信為本衛指揮使指
揮僉事張軌為指揮同知命指揮僉事畢盛仍管
將軍帶刀上直任啓乃掌錦衣衛鎮撫司事調指

揮同知潘晟通州衛指揮僉事劉琰臨山衛錢通
長陵衛張昇龍虎衛 巡按四川監察御史何大
淵奏按察司副使張岳僉事張銘貪鄙不稱銘見
犯贓罪岳以贖睡得名僉事高婦性質庸常且善
避事皆宜黜降

上諭行在吏部臣曰按察司官如此何以律人宜如
御史言別進賢能任之 保定容城縣奏六月以
來霖雨不止白溝河水暴泛漲衝決堤岸下田苗
稼俱傷請發人修治

上諭尚書吳中曰田苗方盛而水潦為災不早治之

其害不已即令軍民協力修築 南京地震

甲戌

上念霖雨傷稼遣中官雷春祭大小青龍之神祈霽
明日霽復遣春官祭謝之

命安遠侯柳升簡都指揮二人督軍脩京城街渠時
又雨行道皆溢故命之 行在工部尚書吳中奏
南京脩埋宮殿已令應天等府以丁多起民夫五
千五百人供役切慮工程繁重卒難成功請再起
萬夫每月一更糧賞皆如例

上曰正農收成之時豈可盡用其力但用五十人

更待為之足矣 水決盧溝橋東狼窩口河岸一
百餘丈行在工部以聞

上命後軍都督府刑部發軍民相兼脩築不可稽緩
巡按福建監察御史彭謙具奏所考察官實跡建
陽縣官非才曠職或酷虐皆當黜

上命吏部黜罰如例

乙亥

遣太師英國公張輔告

吳天上帝

后土皇地祇太保寧陽侯陳懋告

太社

太稷之神定國公徐景昌告

五廟太皇太后

上親告

太宗皇帝几筵

仁宗皇帝几筵

上奉冊寶尊

母后張氏為皇太后冊文曰維洪熙元年歲次乙巳

七月戊辰朔初八日乙亥嗣皇帝臣 謹再拜稽

首上言臣惟若國之務孝理為大孝理之道尊親

為先盖有盛德者必崇夫洪名有大恩者必饗夫
至養彝典所重古今式同恭惟

母后皇后厚德配地至順承

天輔翊

先朝隆熙化本忠和純淑同符漢之明德端一誠莊
上擬周之太任矧惟眇質仰荷

慈恩鞠育劬勞用底成立屬茲維統之始允惟典理
之宜恪循舊章祇舉盛禮謹奉玉冊金寶上

母后尊號曰皇太后伏惟天錫保佑壽福萬年恭承

長樂之歡永侍

聖人之訓臣誠懼誠忤稽首頓首謹言

命正使太師英國公張輔副使定國公徐昌安遠侯
柳升持節冊妃胡氏為皇后冊文曰朕惟邦國之
道本于齊家化理之原在于正內是以夫婦序人
倫之先而帝主示天下之表彝典所重列聖攸同
朕祇奉鴻圖恪遵誠憲咨爾胡氏端莊純一柔順
肅雍選賢嬪予多歷年歲動適珩璜之節言循圖
史之規琴瑟和樂有閑雖好求之美夙夜儆戒有
雞鳴相戒之賢事上表孝敬之心待下溥寬仁之
厚恩允言淑德宜正中宮特遣使齎冊寶立爾為

皇后於戲配尊於帝承祀于廟奉慈闈之養

淳宗族之恩必欵必誠必勤必厚必謙以飭躬必
儉以養福崇德進賢慎終惟初正壺範于六宮表
毋儀于天下茂膺天祿永著德華歆哉

命正使太保寧陽侯陳懋副使少師兼吏部尚書蹇
義持節冊孫氏為貴妃冊文曰帝王理萬邦必以
齊家為本德教于四海必以正內為先朕嗣統
之初肇建中宮之位嘉乃賢淑宜有褒陞爾孫氏
毓自名門早膺慎選嬪于春宮之久茂昭女德之
華恭肅惠和諧琚瑤珩璜之節靜莊純一循詩書

圖史之道通于閔睢樂得之心克謹鷄鳴儆戒之道夙夜匪懈輔益良多用加禕翟之榮俾冠軒龍之貳特封爾為貴妃於戲大一統而端內政予資翼贊之勤率九嬪以副宮儀爾茂徽猷之績敬以相祀仁以進賢惟善以榮身惟謙以崇德惟儉以滋多福惟慎以永芳譽服我訓辭用光寵祿欽哉命正使太子太保成山侯王通副使少師兼太子太付戶部尚書夏原吉持節冊劉氏為淑妃冊文曰朕惟政教之施由內以達外王化之被自家以及邦茲肇建于中宮宜叙升于賢德爾劉氏端一靖莊

肅雍柔惠詩書圖史佩明訓以周旋琺瑯瓊璜整容儀于動履選自名族嬪于春宮遂閔睢樂得之心有鷄鳴鳴儆戒之益爰加禕翟禕軒龍特封爾為淑妃於戲朕惟篤君道爾尚謹于相成后以表母儀爾尚勤于輔佐惟慎以裕德惟善以榮身誠敬以相禮祀謹厚以睦宗族永光寵祿益懋徽音欽哉命正使太子太保陽武侯薛祿副使太子太保禮部尚書呂震持節冊封何氏為惠妃冊文曰淑妃丙子

文武百官上表賀尊

皇太后及冊立中宮右京文武命婦進表賀

皇太后既退進箋賀皇后 鎮守遼東總兵官武進
伯朱榮進廣寧馬市所買馬八十二疋 廣東都
司指揮使李龍奏沿海衛所臨大洋指揮等官多
是新襲少年未諳武畧猝遇寇至慮有疎虞請別
選考老成用之

上諭行在兵部臣曰海道倭夷出沒不時必得老成
之人乃能臨機應變宜精選指揮使正千戶掌印
庶幾行事得宜亦使後輩有所取法 山東德平

縣儒學訓導年富言天下儒學文廟以崇祀先聖
先賢近年以來十哲及兩廡崇祀先賢或置木牌
或塑像或封爵差訛或位次失序甚者闕而不置
有司因循所致乞依洪武中定例重加考核刊布
內外永為定規

上曰朝廷崇儒重道為緊要事而有司不得人如此
命禮部即考正頒示天下

丁丑以尊

皇太后皇后詔告天下詔曰仁政之務親親為先禮
典所崇尊尊為大朕續承鴻業君臨兆庶肆用敦

于孝理爰肇正于化原恭惟

聖母輔翼先朝昭明內治弘六宮之壺範表四海之
母儀深仁厚德施及眇躬降鞠育之恩廣訓迪之
道勛勞備至以底成立茲奉天下之至養則必極
及下之尊稱謹上尊號曰

皇太后乃若宗廟之祀禮本相成德化之行始于

夫婦用稽國典冊妃胡氏為皇后夫國之本在家
允屬彝倫之重上以厚率下庶臻至理之隆布告
中外咸使聞知復鄒銳通政司左通政銳嘗有
過會赦故復之行在兵部臣言各處種馬孳牧

馬驢牛羊等畜倒死者比奉詔書悉免追陪今在
京衛官軍騎操馬及各處衛所有司係官孳畜令
亦准前例

上命悉免之行在錦衣衛指揮僉事曹賓生滕朧
奏釋重囚行在都察院奏賓所犯于律應斬而事
在赦前

上命謫戍保定衛
戊寅以建營

仁宗昭皇帝陵寢于

長陵之右遣官祭告天壽山及后土之神行在禮

部尚書呂震奏今恭上

皇太后尊號冊立中宮已詔告天下請今在外文武五品以上衙門凡正旦冬至拜進

皇太后表文中宮箋各一道

皇太后聖節中宮千秋節各王府長史司依例進表箋慶賀從之 韓王冲城奏初之國平涼資用未備居屋未修護官軍憚遠多逃請改國江南

上遣書答曰國中凡百費用已令有司措置宮室亦令工部修理軍校在逃者可令護衛儀衛司以名奏聞即行所司追捕發去所云諭改國江南則有

先帝之命在固不敢違且聞平涼善地先帝所擇以處至親人情居久則安矣 晉王濟瑣以

上即大位奏請躬詣京師朝賀

上以遺詔有命且藩屏之重地方切倚賴復書止之自後諸王奏請朝賀者皆如之 召鎮守淮安都指揮閔福還京

命四川永寧宣撫司經歷張守規等二十四人致仕時行在吏部言守規等皆年七十以上耳目昏不能任職

上曰七十致仕古今通與然亦有不聽去者亦其才
尚可用也既皆聰明不逮留之何益聽致仕去以
順人情經行在都察院右副都御史戈謙上言二
事其一經國理民固以人才為本而所係之重尤
在守令蓋守令得人則民受其福而大平可興不
得其人則民受其殃而風化以替此自古所重必
審擇其人而後任之也臣頃經北京直隸及山西
陝西其府州縣官多缺兼今歲兩少夏麥薄收秋
種半未入土民心愁戚形見容色既無守令撫接
而上官念慮亦不及此乞勅吏部公同五品大臣

于見在聽選官及郎中御史給事中行人進士監
生選擇堪任守令者授以郡縣之職伏願親發玉
音叮嚀誠諭使感恩畏威不敢妄為如此則官無
暴虐之政民免失所之憂矣其二朝廷買辦諸色
物料有司給價十不及一况展轉剋減上下糜費
至于物主所得無幾名稱買辦無異白取且一夫
工作上農不過百畝中下之農僅以其半除夏秋
二稅所存無幾苟再分外侵耗使民不貧而困者
寡矣蓋有司官顧望進退不敢遵依時值意謂有
益于官無患于已然不知科派頻仍民力不支逃

竄流離所謂有善于官者實所以為官損矣所謂
無患于己者實所以為己患也苟不虧其價值使
民常得安生樂業如有急需應^與辦集始若損于
官終實益于官始^若患于己終實便于己較之于前
其功效相去不啻十百傳曰財散則民聚又曰百
姓足君孰與不足正為此也臣願自今以後欲有
買辦如果不係軍需急用之物乞且停止候民力
完實年穀豐稔然後派買實為民便民便則國安
國安則天下無事而致治之道可馴致矣
上覽之顧謂侍臣曰守令民之父母豈可曠缺選拔

除投實合朕心至于科買諸物每令實與價較虧
價損民有司之過易曰損上益下則為益損下益上
則為損宜速行戒約有不悛者必加之罪 巡按
湖廣監察御史賴吉言布政司叅議莊謙才按察
司僉事張善皆庸懦不稱岳州府知府同知通判
經歷檢校安鄉平江二縣官皆非其才或恃酒貪
虐或怠廢政事宜加黜罰具以名聞
上命吏部如所奏黜降又諭之曰牧伯守令以承流
宣化為職任非其才下受其害尔吏部宜加意旌
別無怠 免故忠誠伯茹瑄男瑤墉為民永樂中

珍墉生累沒入官謫戍廣西河池

仁宗皇帝即位遣人召還至是珍墉及家屬二十七人皆至

上命悉放為民仍給沒^官房屋田產 順天府懷柔縣

知縣邵景亨奏本縣山場舊禁樵採輸官薪炭措辦實難今自黃花鎮東至紅螺山去天壽山已遠乞弛禁以便民

上可奏諭行在工部尚書吳中等曰弛禁便民朕所不吝若採之無節恣意砍伐則材木易竭宜令以時取之仍禁傷其根本庶幾可常資用 南京地

震

己卯

陽武侯薛祿言大同操^備官軍二萬人月支米五

斗宣府一萬人月支米三斗多寡不同均給四斗

仍定為例從之 文趾布政司奏各府州縣儒學

自永樂十三年開設以來並無選授教官多是土

人訓誨通經者少諸生頗知讀書然皆言語侏離

禮法疎職維務空業未習風化若除教授學正教

諭董率土人訓導端其模範示以教條庶幾^日就

月將耳濡目染變蠻夷之習復華夏之風實為美

事

上曰古稱立賢無方又曰有教無類况師者人之範
用夏變夷莫先于此其令吏部選除 浙江烏程
縣知縣黃際宗奏永樂二十二年五月若雨田
盡傷通政司左通政岳福以聞蒙免所徵秋糧至
七八月雨潦尤甚淹沒田稼一千六百一十一頃
九十餘畝該糧五萬三千九百九十石有奇小民
辦納為難乞候今年秋成通徵從之 夜有流星
大如鷄彈色赤尾跡有光出勾陳西南行入紫微
東蕃

庚辰

漢王高煦陳奏利國安民四事

上覽之喜命有司施行

上復書謝之曰叔父忠存宗社遠辱嘉謨銘感于心
已悉付所司施行惟願惠教是所深望既而廟臣
相 永樂中

皇祖嘗諭

皇考及朕謂此叔有其心宜備之然

皇考待之極厚如今日所言果出于誠即是舊心已
革不可不順也

賜諸王黃白金文綺錦紗羅布鈔有差

上諭行在禮部臣曰朕初即位諸王宗親守藩在外亦有賜賚用展親親於是周慶代寧潘漢趙七王各白金五百兩文綺二十表裏錦五疋紗羅各二十疋雙羅錦五疋西洋布十疋鈔二萬貫漢趙二王各加賜黃金百兩晉楚魯庸遼韓唐伊秦蜀十王各白金三百兩文綺十表裏紗羅十疋^塊羅^錦三疋西洋布五疋鈔二萬貫

賜寧國大石南康永嘉含山汝陽寶慶七大長公主及水平安成咸寧三公主各白金二百兩文綺

十表裏紗羅十疋錦二疋^塊雙羅錦三疋西洋布五疋鈔一萬貫行在工部臣奏修韓王宮殿詣令陝西布政司都司協力為之

上曰兼用軍民固為成功然須戒飭毋擾下人

命行在都察院右副都御史戈謙為交趾布政司右布政時交趾布政成遜由貪淫黷逐命謙代之

陞大理寺右寺丞陸禎為交趾布政司左叅議擢吏孫子良為右叅議禎先從總兵官在交趾子良先任兵部武選郎中有罪謫交趾充吏至是掌交趾布政司事兵部尚書陳洽奏舉二人通達政体

又在交趾請知夷倍堪任叅議遂有是命行在
都察院奏遼東廣寧右衛指揮使宋祥知妻兄孟
賢為常山中護衛指揮僉事時造反逆謀而不舉
奏于律應斬

上命謫戍緣海衛 夜有流星大如鷄彈色赤白有
光出勾陳南北行至近濁

辛巳

占城國王占把的賴遣使臣逋沙怕麻叔等奉金
葉表貢金銀香象牙犀角方物
賜在京官吏軍民人等白金公一百兩侯八十兩

文武官一品二品六十兩三品三十兩四品二十
兩五品十五兩六品七品十兩八品九品雜職五
兩將軍旗軍校尉人等各二兩聽選辦事文武官
及監生生員人才吏典僧道陰陽耆老醫生工匠
廚役樂人各一兩優給幼官及試職千百戶鎮撫
老疾幼軍各于其例減半四夷朝貢之人有職事
與京官同無職事者正使十兩副使及冠帶頭目
通事舍人通打刺罕回回各伍兩無冠帶頭目把
事舍人回回各二兩從人各一兩各處管工各自
七月二十日以前到京者都司布政司按察司官

知府指揮各拾兩千戶百戶州縣等官各五兩旗
軍工匠吏典人等各一兩凡三十二萬九百五十
人給銀九十六萬三千八百二十九兩
壬午

漢王高煦遣世子膽坦來赴

仁宗皇帝喪 遣行在鴻臚寺司賓署丞焦循攝禮

部中鳴贊盧進攝鴻臚寺少卿以即位詔頒朝鮮

上諭之曰朝鮮為國東藩世修職貢朕嗣承大統所
宜詔告爾將命尚以禮自持用副任使其慎之
賜朝鮮國使臣孟誠等鈔綵幣表裡金織羅衣

絹衣有差

上諭行在禮部尚書呂震曰遠國朝貢固有常分然
我祖宗以來待下素厚今朕即位之初凡事必循
舊典勿失遠人之心 河間府阜城縣耆老李彬
言近奉詔書內一款鰥寡孤寡及篤廢殘疾者有
司依例存恤無令失所及以罪編民種田年七十
以上無人養贍者遣回原籍今本府以罪為民者
多年雖未及七十而其間殘疾孤寡無人養贍乞
食度日者十之四五生無所資死無所歸實遣還
依親庶得全生

上嘉其言命行在戶部臣以所言行之 軍民任本
等教人自宮以^用行在禮部尚書呂震以聞
上曰

皇考在御時嘗有自宮者以其毀親遺體為不孝皆
發戍交趾令此人尚敢^爾即編例發遣更申禁約
再有犯者悉如之 昏刻有流星大如碗色青白
光燭地出閣道東北行至^近濁

癸未

賜趙王高燧田園八十頃有奇以初之國故也
調鳳陽府同知王鳳等一百六十九人為交趾府

州縣官行在吏部奏中外官初有罪罰後逃匿者
曾經赦宥

仁宗皇帝臨御命於交趾任用今鳳等所犯事同請
如例調用從之復命有年六十以上精力衰者罷
為民 賜雲南鎮沅府知府刁騰等交趾嘉林州
土官判官阮祐等四川烏蒙軍民府把事阿賴湖
廣金峒安撫司把事冉中廣西上思州土官知州
黃智永貴州羅番等長官司舍人龍通源等鈔紵
絲紗羅絹有差

甲申

太宗皇帝小祥

上率親王詣 几筵行禮

乙酉

陞大寧都司都指揮同知金順為行在左軍都督
府都督僉事 巡撫浙江右都御史周幹言嘉興
府海鹽縣地臨大海數被倭寇洪武中設海寧衛
及澈浦乍浦二千戶所^陸置煙墩水置海舡官軍
往來巡警晝夜有備盜賊屏息百姓安堵永樂七
年革去烟墩移置海舡於沈家門水寨相去一千
餘里倖有寇至消息難通及官軍至賊舡已退官

軍既回賊舡復入軍無休期民無安枕仍舊各守
地方及量發附近官軍助守每歲令廉幹都指揮
一人總督操備庶幾倭賊知懼軍民兩便

上曰前更改時自以為是矣今復欲改亦為輕率古
語利不十不変法其令都督府遣官與浙江福建
三司官及倭倭總兵熟議便利以聞

命行在兵部右侍郎戴綸往交趾叅贊軍務賜綸勅
曰尔往交趾副尚書陳洽贊理榮昌伯軍務夫邊
寄重任尔以六卿之二叅其間宜端謹勤密以称
任尔往欽哉 夜有流星大如鷄彈色赤尾跡有

光出天津東北行至雲中

丙戌

改行在前軍都督僉事劉鑑于南京後軍都督府
陞河南都司都指揮同知王教為行在前軍都督
僉事以進士蔡子宜為儒學訓導子宜永樂六
年以親老歸侍親終服闋七年不赴及是遇赦始
起吏部劾其顧私忘公唯以任用

上曰懷^士人情之常非有大過且辛若學問得成進
士不可終棄其授以儒學訓導降前江西布政
司右叅政潘賜為刑部浙江清吏司主事賜先生

事謫交趾辦事會赦還京故有是命交趾各府

州縣儒學選貢生員王憲等八十二人至京師

上諭行在禮部尚書呂震等交^趾距京師萬里遠離

親戚而來須是教養得宜彼乃樂學可望其成材

爾與學官宜知朕此意其衣服歲賜一如雲南之

例遣行在戶科給事中樊敬等^賜營造山陵官軍

工匠鈔

丁亥

靖江王佐敏遣奉國將軍佐敏請

太宗皇帝^凡廷行小祥祭禮畢辭帝賜鈔五千貫命

兵部給驛舟 哈密忠義王勉力帖木兒遣都指揮脫晚不花福餘衛千戶把秃兒泰寧衛都督阿者罕妻歪刺失重千戶把秃不花等來朝貢馬 陞指揮同知把兒及為行在前軍都督府都督僉事

命故左軍都督僉事張達子鑑襲金吾左衛指揮使 故都督指揮僉事朱福子能襲金吾前衛指揮使 常山左護衛指揮僉事呂福子能襲羽林前衛指揮僉事金吾右衛指揮使許庚子文羽林前衛指揮使王礼子剛指揮同知徐敬子友劉海子榮羽

林右衛指揮使謝貴子讓府軍右衛指揮僉事薄貴叔原府軍後衛指揮僉事童真弟旺燕山左衛指揮僉事任貴子能王二姪昶大興左衛指揮僉事張成子榮旗手衛指揮僉事于全叔勇俱襲山東都指揮僉事陳忠弟禮襲指揮使於存 在羽林前衛帶俸上直守衛金吾左衛左所王千戶周思隆嫡孫斌襲陞指揮同知蓋思隆有軍功未陞而卒故以命斌

命慶府長史張彝典簿李守忠致仕仍就王府食祿 不治職務從慶王柚所奏也

上因諭行在吏部臣曰王能不遺舊人有始終之義亦厚之道如彛等及能終効規益斯君臣兩善矣
戊子

陛行在陝西道監察御史陳遜為雲南布政司右
叅政行在刑部湖廣清吏司員外郎沈定為湖廣
布政司右叅議行在左軍都督府經歷劉斌為陝
西布政司右叅議福建道監察御史魯穆為福建
按察司僉事河南道監察御史王鉉為浙江按察
司僉事行在工部屯田清吏司主事葉承宗為湖
廣按察司僉事永平府盧龍縣知縣葉瑄福建同

安縣知縣劉性同廣東英德縣知縣陳油為監察
御史瑄行在山西道性同行在貴州道油行在四
川道擢庶吉士黃澍薛理揚昂高舉山東章丘縣
儒學訓導張居傑儒士係銘為給事中澍居傑行
在戶科銘行在禮科昂行在兵科舉行刑科銘故
禮部侍郎儀智之子兵部右侍郎戴綸薦其才堪
用居傑考滿應陛學者奏乞再留

上俱命為給事中因諭少師吏部尚書蹇義曰前代
命官內外更踐近頗聞外間言仕者一為教官即
老于學校有志于世用者多不樂就此職自今用

人不得執一 調廣東按察司副使成寧可為福建按察司副使

命都指揮卞福仍行開平徠倭先是都督翼傑與都指揮唐銘同守開平既召傑還遂命福性副銘復前太僕寺丞郭崇義官聽致仕還滁州初崇義為太僕寺丞永樂中奏乞致仕以違例謫交趾中途遇赦還至是自陳臣愚誤觸

天聽以致顛越今老不能報効乞矜憐賜開

上命復其職仍聽致仕崇義又言臣本壽州人今祖父墳墓皆在滁州願得守墓為便遂命歸滁州

行在鴻臚寺司賓署丞賀沈言臣父銀故通政使蒙恩贈工部尚書

仁宗皇帝以臣父故授臣前職送國子監讀書命從科舉出身緣臣母胡氏老病伏望

聖恩憐憫放_回讀書養母終年

上曰學者學為忠與孝也母老可使違養乎命禮部從其請 行在工部奏浙江布政司言本司治所為火所燬暫蓋席舍治事今亦敝壞請于農隙之時役丁多之民採木重建從之因命天下諸司凡廨宇頽敝者聽修葺 廣西慶遠府思恩縣奏本

縣累被蠻寇出劫殺傷官吏細民逃避失所採食
蕭蒿以救飢饉永樂二十一年二十二年稅糧難
于催納乞以其半折鈔每石折三十貫送赴本布
政司官庫收貯從之 河南臨漳縣奏六月大雨
漳滏二河皆泛漲衝決三家等堤岸二十四處
上命行在工部即發所在軍民修築

乙丑

勅總兵官都督譚廣曰言者皆以雲南萬全左右保
安右及懷來四衛當益兵守備今其官軍之在宣
府操練者宜各遣還遇有聲息仍聽爾調遣各城

堡烽燧不堅固器械不精利者宜即修治軍中或
利有當興者弊有當革者具奏處治務使軍士得
所邊境無虞庶副委任之重

上諭行在工部尚書吳中等曰天壽山營造民夫勞
勩可移文原籍有司免其戶丁徭役事畢仍舊又
諭中曰兩潦暴漲朕慮各處並河堤岸多衝決今
秋稼垂成民食所係宜速遣人嚴督有司巡視衝
決者即時修築 陞忠義中衛小甲甄成兒為百
戶先是虜寇侵薊州黃崖口守備官軍失職東勝
右衛指揮同知李遠等率兵夜出鮎魚石追敗之

斬首一級獲其人口軍器馬牛事聞勅鎮守薊州
山海都指揮金事陳景先第功次以聞至是景先
奏追襲指揮李遠等官軍四百三十二人斃成兒
斬虜首一級奮勇効力者二百四十三人接應者
一百九人

上曰官軍皆陛一級小甲卑役乃能斬虜功在人上
其超陞世襲百戶賜鈔一百錠綵幣表裡^二其奮
勇殺賊管隊指揮鈔二百錠綵幣表裡二千戶鈔
一百錠綵幣表裡二百戶鈔八十錠綵幣表裡一
總小旗甲舍人鈔六十錠絹二疋老軍餘丁引路

民人鈔四十錠綿布二疋齊力向前千百戶鈔八
十錠綵幣表裡一甲軍鈔二十錠綿布一疋接應
指揮綵幣表裡一千百戶鈔四十錠絹二疋旗軍
鈔十錠綿布一疋

賜番僧大同師叔的達僧官刺麻高僧僧人班丹
端竹等三百二十六人白金有差 行在吏部言
旌德縣儒學教諭林蘇前歷九年無舉人例當追
俸充軍

仁宗皇帝在東宮特垂寬宥令再教三年今又無舉
人請罰如例

上曰先朝嘗寬宥之可再令教三年若復無成罪之未晚 日生左右四珥色黃赤鮮明

庚寅

行在工部尚書吳中奏今

山陵事嚴工力不敷乞于河南山東山西直隸鳳陽大名諸府州起民夫五萬協助度幾早完

上從之命行在吏部侍郎黃宗載等分往各處擇丁多之家起取候秋成軍赴工滿三月即放仍令有司免其家兩丁差役三月 改四川雅州學正何源為土官得門吏目源雲南人以監生授學正自陳

不通經學難為師範願改他職

上諭行在吏書蹇義曰非經明不可為人師雲南人固不通經量才授職則人皆効用不廢事此亦初授之際失於酌量其改為土官衙門吏目彼知土俗亦得展布 瓦刺只見瓦及等六人來歸奏願居京自勅命為百戶賜冠帶金織襪衣綵幣銀鈔綿布鞍馬仍命有司給房屋器皿等物如例 陽武侯薛祿奏鵬鶚赤城雲州獨石諸站皆在邊野開平老幼餘丁亦於此種田猝有虜寇無城可守况開平獨石相距五站城垣不堅且使命往來道

路荒遠若移開平衛於獨石令鎮守宣府都督譚
廣所領官軍築城守備實為便益

上曰開平極邊廢置非易事當徐議

辛卯

趙王高燧奏護衛軍士當建營房原撥地少不足
分給彰德軍民之家多有閒地請命有司勘實撥
賜

上從之諭行在戶部尚書夏原吉細民有不得所朝
廷當與處置况親王乎且裁有餘以補不足亦是
均平之道 土魯番地都督僉事尹吉兒察四川

播州宣慰使楊升貴州貴行等長官司長官宋昌
等來朝貢馬 行在吏部奏交吐布政使戈謙由
副都御史初陞輒乞還鄉祭祖然後赴任緣先奉
仁宗皇帝聖旨外任官須九年考滿乃許祭祖

上曰謙赴遠任欲展省而行此人情也許之 行在
戶部奏山東黃縣累年被災逋稅糧皆蒙蠲免永
樂二年一年雖未有傷然困悴之餘亦難辦納乞
折納鈔

上曰比年災傷之處不特黃縣宜視各郡縣本年有
未納者皆令折鈔以甦民力 總兵官征南將軍

鎮遠侯顧興祖奏廣西潯州府桂平縣大藤峽地
連貴縣平南武宣及御州慶遠山勢陡峻江灘迅
急蠻寇據為巢穴每每于此出劫殺人掠財自潯
州至宣武江路阻溢二十餘年今親領官軍至宣
武峽口水陸夾攻剿滅渠克餘黨悉平邊境寧息
征虜前將軍鎮守遼東總兵武進伯朱榮奏近虜
寇入境調都指揮唐琦率兵追擊至駱駝嶺斬虜
首級護其羊馬六十五榮又言朵顏衛達官指揮
哈刺哈孫等不來朝貢馬或有二心遣都指揮唐
琦等率兵偵之果若居懷二即棄不倫執之

上曰古者馭夷來不拒去不追今雖不朝貢亦未敢
擾遠邊加以兵非懷遠之道遂勅榮曰馭夷直寬
用丘貴審况虜多詐未可輕忽勅至但整棚部伍
謹慎隄備其來不來不足計也 真定府奏六月
以來霖雨滄沱等河皆漲衝決堤岸定普深三州
藁城無極饒陽新樂寧晉五縣低田皆沒
上命行在戶部遣人勘視

壬辰

封後軍都督府左都督吳成為奉天翊衛宣力武
臣特進錄祿大夫柱國清平伯食祿一千一百石

子孫世襲成山後人初名買驢永樂中賜姓名事
太宗皇帝以功積官至都督
上以其事

祖宗劬勞居多至

上嗣位嘗獻忠懇故加封爵給誥券追封其三代祖
考皆清平伯妣皆夫人封其妻夫人 召尚寶司
少卿袁忠徹忠徹父庭玉以相術事

太宗皇帝于潛邸官至太常寺丞卒忠徹習其父之
術累官至少卿

仁宗皇帝初嗣位請告省毋命侍毋以俟召命及是

召還職

命後軍都督同知鄭銘鎮守徐州 行在工科給事
中吳彛等劾奏比者行在工部侍郎蔡信奏請南
京廊房十間與家人居

聖恩與之緣信於

仁宗皇帝時已奏請來賓樓一所以居家人今隱匿
不言復請廊房貪冒欺詐宜寘之法

上曰小人務利何有厭足但今山陵方資其用姑宥
之 西安衛軍校告掌陝西都司事都督僉事胡
原過秦正府門馳馬不下進表箋怠慢不謹及市

私茶等事都御史劉觀請逮治之

上曰原固有罪但念舊臣

皇祖神守陝西委託亦重姑宥之其備錄所訴狀示之使改不改不宥行在大理寺卿虞謙等奏貴州道監察御史所鞠強盜嚴閏等十一人皆南陽衛軍固稱河上運磚具有證驗為人所誣再經番勘不伏請如例會六部都察院通政司等衙門堂土官同審

上曰強盜極惡須令死者心服乃可當與辨明庶不罪及無辜永平府樂亭縣民胡敬言致治莫急

于聽言言路通塞治亂繫焉古之聖君未嘗自聖必稽于衆舍己從人臣願

陛下開不諱之路廣忠諫之門清問下民平易近物聽受忠鯁不拒拂逆則上無壅聽下無隱情而嘉言嘉謨日有所聞矣臣又願

陛下言必信用必賢戒無益慎虛名勅天命恤民隱夫上務信則事不因循而可有功用必賢則治功興而民生遂不作無益則賦歛省而民不困不尚虛名則無好大喜功之患守儉約而德愈崇矣天者理而已動靜云為常存戒飭則事不違天而天

眷之民惟邦本凡有動作思民力艱難則德洽民而黎民永懷如是則政治修舉

聖德日新和氣自臻雨暘時若四夷來庭邊境清晏陛下端拱無為熙熙皞皞可以駕三代而進唐虞尚何慮古治之不及哉臣愚伏望

陛下誠于求言以來天下之善而于六者終始力行則天下幸甚

上喜納之夜有流星大如盃色赤光照地起五車東北行至北斗魁炸散

癸巳

廣西上隆州故土官知州毋陳氏雲南武定軍民府金沙江巡檢司故土官巡檢子劉進忠雲南縣徐甸巡檢司巡檢等李花來朝貢馬 遼東廣寧

馬市閩千戶王咬納等進所買韃官官馬四百六十五匹 陛下陞交趾布政司左叅政劉子春為廣西按察司按察使子春嘗為春坊中允累遷至叅政仁宗皇帝即位以舊宮臣召之至是始至遂有是命以故應天府府丞張執中之子俊為鴻臚寺司賓署署丞先是

仁宗皇帝即位念執中舊人有守成功召其子欽官

之使者至其家與執中孫守謙來守謙自陳未嘗
學有叔後今居南京實與祖同力守城者遂召至
命以是職行在吏部言行在禮科給事中傅安
使撒馬兒罕留二十餘年始歸請給勅命雖其歷
年久未經考覈例難給授

上曰安為朝廷使遠夷象苦多矣可拘常例乎其即
授之行在戶部奏直隸鎮江府丹徒縣民戚丑
閔莫勝七等言所種官田五十五頃七十餘畝濱
江為風潮衝決之江該稅糧二千一百餘石官府
仍舊徵納

上命除之顧謂尚書夏原吉曰民艱苦不止于此比
來各處數言入秋霖雨水潦泛濫塗沒田苗實多
此事天灾流行人難為力卿宜令所司覆勘若果
成災稅糧皆當斟酌減免毋困民夜有流星大
如鷄彈色赤尾跡有光起天搶西北行至雲中

甲午

賜隨從漢世子郡王指揮劉興等金織綺絲幣細
絹羅衣等物有差

賜占城國使臣逋沙怕麻叔等鈔絲幣表裡羅絹
龍衣有差賜通事舒義等冠帶仍命賚文錦綺絲

紗羅歸賜國王 行在戶部言危刺歸附人亦速
不花等今授都指揮等官請於錦衣衛月支俸糧
上曰虜人來歸非藉俸賜何以自養如例給之又曰
昨本雅失里妻及外母亦宜優贍每月各與米五
石 北京會同館奏^雨壞堂屋墻垣

上諭行在工部尚書吳中曰四方使命往來宜有依
庇其速繕理 浙江黃巖縣知縣劉道成奏本縣
所屬二十餘都田低下率多水潦四十餘都田高
溝港淺溢恒慮旱乾舊于海際築閘十八所土垣
一十餘處啓閉以時預防旱勞後皆頽壞永樂間

本府增設通判一員專理農務重加修治甚為民
便比以汰冗員而去今本縣公務益繁提督不周
兼值連歲洪水海潮衝蕩者多乞仍舊增設府官
一員專治農事每歲秋成後興工修築以便民從
之

乙未

雲南金齒軍民指揮司騰衝守禦千戶所土官千
戶張銘嵩明州故土官姪趙三應等來朝貢馬
命陝西都指揮使李達復職仍守洮州達定遠人初
為廣寧中護衛指揮使建文中陞都指揮使調陝

西都司永樂初守洮州坐事發隨武安侯立功至
是遇赦還兵部言當復指揮

上察其能令復都指揮使仍守洮州 行在都察院
奏北京行在工部主事魯宗儒採木四川受賕又
盜官木毆死民夫強佔人子女為妾雖是在赦前
而情犯深重

上命杖一百謫戍廣西因諭左都御史劉觀曰五刑
謂之天討以其至公無私若以私意為重輕非天
討矣尔法司能以公存心而行之必忠厚亦可感
召和氣為邦家之福于尔有利焉若立心不公輕

重任情枉及良善人將歸咎朝廷鬼神鑒之亦非
尔等之福如犯者情有可矜罪有可疑尔懷一慮
不欲自斷者為朕言之當為裁決 行在大理寺
奏行都察院祈問大辟重罪

上曰刑法非政理之本然有罪不治無以懲惡必得
實情則施刑者無愧受刑者不怨卿等最宜詳慎
四川茂州奏州城臨邊新建學校未有文廟無以
奉祀先聖止借茂州衛閒屋教授生徒而州治之
南舊有護林驛道路迂僻使客甚稀請增修為學
而改州門鋪為驛以舊軍稅課局為鋪使師生講

學有依聖賢祭祀有所從之 夜有流星大如盃
色青白尾跡有光起羽林軍東南行至近濁

丙申

造鄴王等八府鍍金信符銅牌八副

命山東鹽運使唐鑑致仕鑑鳳陽虹縣人故太子少
保兼兵部尚書鐸之弟

太祖皇帝選為散騎舍人累陞今職年老目眇巡按
御史言其昏惑不任事鑑亦以疾自陳行在吏部
言當令為民

上曰聞鐸洪武中名臣鑑之進用蓋以鐸故今老疾

無過亦可見其循謹宜體

太祖進用之意俾冠帶致仕以全始終之恩 巡按

四川監察御史何文淵言

太祖高皇帝令天下州縣設立老人必選年高有德
衆所信服者使勸民為善鄉閭爭訟亦使理斷下
有有益于民事上有助于官司此誠良法比年所用
多非其人或出自僕隸或規避差科縣官不究年
德如何輒令充應使得憑藉官府肆虐閭閻或因
民訟大肆貪饕或求公文橫加騷擾妄張威福顛
倒是非或遇上司官員按臨巧進讒言易置賢愚

變亂白黑挾制官府比有犯者謹已按問如律切
慮天下州縣類有此等請加禁約

上諭行在戶部臣曰必申明洪武舊制選年高有德
者充違者併有司皆寘諸法 北京順天河間保
定三府順義懷柔肅寧任丘靜海慶都清苑雄八
縣及永州灤州各奏今年夏秋多雨河水泛溢滄
沒田苗命戶部遣人勘視 昏刻有流星太如盃
色赤有光起壁東南行至近濁

丁酉

陞哈密忠義王遣使臣都指揮同知脫脫不花為

都督僉事千戶把把孩為都指揮同知 武進伯
朱榮卒榮山東兗州府沂州人洪武中選充府軍
衛驃騎舍人陞總旗征雲南有功陞百戶進大寧
前衛副千戶

太宗皇帝靖難以功累陞至左軍都督府都督僉事
永樂四年征交趾陞右都督八年從

車駕征北虜至靜虜鎮進左都督後屢從征迤北剿
戮胡寇以功封奉天翊衛宣力武臣特進榮祿大
夫柱國武進伯食祿一千二百石子孫世襲二十
二年從從至龍虎岡還奉命佩征虜前將軍印鎮

守遼東至是卒訃聞遣官賜祭賻贈有加追封武
進侯謚忠靖子冕襲伯爵

